



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**16. Kalenderwoche – ab 18. April 2010**

## Das Dudznd is voll!

Ährlisch, isch hadde selbor gahr nisch dran gedachd - an unsorn Geburdsdaach von dor Gabaredd-Gisde! Erschd, als wie wo mei Gumbl mir gradulierd had, zum volln Dudznd, da isses mir dann nadiehrlich ooch gleisch selbor eingefalln. Nähmlisch, dass das Dudznd voll is! Un e volles Dudznd, das had ja ooch eene gewisse heehore Bedeutung - e Dudznd is ja nisch bloß eenfach zwelf Jahre. E Dudznd das is ja schon eene ganze Ähra!

Nee, du grischsd de Diere nisch zu - zwelf Jahre Gabaredd-Gisde - un das am Schdig! Nisch eene Bause! Heeschdens ma baar Daache im Sommor, wenn sobiso keene Sau komm dud.

Das is ja eischendlich das greeßde Broblehm, dass mir mid dor Gabaredd-Gisde ham - also, jedzde nisch dor Sommor an sisch, abor annre Schdädde ham ehm im Sommor e baar Dourisdn, die dann ahmds ins Gabaredd gehn wolln. Weil se sisch ma e bißl noch amisiern wolln, nachm anschdrenghenden Daachesbrogramm. Seidsiing un so!

Was gloom Sie, was in Dräsdn un in Leibzisch odor ooch in Bährlin fiehr e Gedrängl is - in de Gabaredds! Villeischd zwee drei Einheimische dabei. Sonsd alles Dourisdn odor Geschäfdsleide un so. Un das ibor de ganze Woche. Ooch Mondachs! Un im Sommor! Nee, dadervon kenn mir in Gemnidz bloß dräum. De Reisebusse machn leidor um Gemnidz meisdns een großn Boochn.

Mir hamm haubdsäschlich de Einheimischn, die komm dun. Un die sinn anschbruchsvoll! De Dourisdn, die kannsde mid e baar Galauors un Widze abschbeisn - die komm sobiso in de nächsdn

baar Jahre nisch widdor vorbei. Abor wensde sähn mus sd, dass de Einheimischn immor widdor ma vorbeiguggn dun... da mussde Dir was einfalln lassn. Un immor widdor was Neies! Was gloom Sie, wie mir manschma de Riebe gliehn dud! Un das nisch bloß, wensch off dor Biehne ins Schwidzn komm - nee, ooch wensch mir dähn ganzn Bleedsinn aushegn muss!

Dourisdn sinn eenfacher!

Abor da kann keenor was dafiehr, dass uns de Dourisdn in Gemnidz fähln dun. Das is ehm so. Das dud mid dor ganzn Hisdorie von Gemnidz zusammhäng. Un die kannsde riggwirgend nisch ändorn! Da kannsde dir noch so viele Wärbeschbrische aushegn - "Schdadd dor Moderne" un annre scheene Schbrische... das dud nischd nidzn! Mir sinn ehm bißl schleschd weggekomm, geschnibor annre Welschdädde.

Abor isch will nisch jammorn - zwelf Jahre hammor de Siduadsion gemeisdord un sinn ordendlich ibor de Rundn gekomm hier in Gemndiz! E Dudznd hammor voll gemachd! Eene ganze Ähra! De zweede Ähra dud jedzde anfang!

**Eduard Sachsenmeyer**